

Agong redah banjir tinjau situasi bencana

Bernama

Disember 19, 2021 05:27 MYT



Keberangkatan Seri Paduka bagi meninjau situasi banjir di ibu negara dirakam dan dimuat naik di laman Facebook Istana Negara.

KUALA LUMPUR: Yang di-Pertuan Agong Al-Sultan Abdullah Ri'ayatuddin Al-Mustafa Billah Shah meredah air banjir di sekitar Pusat Dagangan Dunia (WTC) di sini malam tadi ketika meninjau situasi banjir di ibu negara.

Keberangkatan Seri Paduka bagi meninjau situasi banjir susulan hujan lebat sejak Jumaat itu turut dirakamkan dan dimuat naik di laman Facebook Istana Negara.

Catatan itu menyatakan Seri Paduka telah berkenan turun dari kenderaan Baginda sewaktu hujan lebat di jalan susur menghala WTC dan meredah air banjir bagi melihat sendiri situasi di sekitar kawasan tersebut.

"Keberangkatan Seri Paduka Baginda mencemar duli adalah cerminan keperibadian tinggi dan kasih kepada rakyat baginda tanpa mengira tempat, masa dan cuaca," menurut catatan tersebut.

Lembah Klang dilanda banjir menyebabkan ribuan penduduk dipindahkan ke pusat pemindahan sementara serta sejumlah pengguna jalan raya terkandas akibat laluan yang dinaiki air dan ditutup.

Selain Lembah Klang, banjir turut dilaporkan berlaku di Pahang, Melaka, Negeri Sembilan, Perak, Kelantan dan Terengganu.

Perdana Menteri Datuk Seri Ismail Sabri Yaakob telah mengarahkan semua kementerian berkaitan menggerakkan aset ke kawasan terjejas banjir bagi memastikan rakyat diselamatkan dan ditempatkan di pusat pemindahan sementara dengan segera.



Istana Negara ✓
on Saturday



19 Disember 2021 - KDYMM Seri Paduka Baginda Yang di-Pertuan Agong, semalam, berkenan berangkat meninjau situasi banjir di ibu kota susulan hujan lebat yang melanda Ibu Kota sejak 24 jam yang lalu.

Seri Paduka Baginda telah berkenan di tengah hujan, menuruni kenderaan Baginda di jalan susur menghala PWTC dan meredah air banjir bagi melihat sendiri situasi banjir di sekitar kawasan tersebut.

Keberangkatan Seri Paduka Baginda bercemar duli adalah cerminan keperibadian tinggi ... See more

